

四庫全書

集部

欽定四庫全書

集部

楊李詩繫卷

二十一

詳校官侍講_臣王燕緒

主事銜_臣徐以坤覆勘

總校官進士_臣朱鈐

校對官修撰_臣吳錫齡

謄錄監生_臣葉大奇

欽定四庫全書

橋李詩繫卷二十

平湖沈季友編

明

曹侍郎勲

勲字允大號我雪嘉善人崇禎戊辰會元授庶吉
士官至禮部侍郎時門戶角立勲負時望在講筵
每隱護正類侃侃言之乞養十年留都召起見時

事難為規切相臣尋以母喪隱居東干自署東干
鈞叟著有存笥行笈未有居東干諸集詩以情意
為主近似公安而就紀律者同館劉桴平方肅之
輩同聲共響雖一時風氣使然實得詩人和平之
旨

舟居

一帆無定指聊得避紛紜水宿常疑雨山明更喜雲酒
情須午過暖意近春分自活爐中火花前不敢熏

南池次少陵韻

不為南池勝誰來艤客船橫江人似鶴深樹晝宜蟬李
杜千秋句青徐六月天鄉心看逝水此意冷於蘊

別爾新

稍為君留亦不遲且賒山約待他時未行先擬將來訂
纔晤仍愁既去思欲寫淒迷艱一字終慙決絕負雙卮

滿江風雨孤舟夢怕讀方髯南嶽詩

指肅之

冬日京邸漫成

枯柳如柴束幾重煨來楮拙覆缸紅滅炊未肯羞童子
徙突何曾誤乃公鼠壯欲消三月俸貂寒還怯五更風
春迴不管人南北歷歷江雲在眼中

三日小飲女郎處

相逢便約煮新蔬近水衡門且食魚避客轉憐雛校史
辭官猶署麴尚書當場二妙爭花案隔壁三家認草廬
最是閒人閒不得平章風月又春初

得左大來梁辰須裴晉卿諸門生京邸書兩年

始到

天上人間歲月移故人猶記老漁師
登高肯許乘風便望遠寧愁計日遲
吾道不隨滄海變世情惟有碧山知
只祈耕稼村村足未敢逢人賦黍離

長至後三日大雪

百年急景笑蹉跎一線長添得幾何
麥種未青方破甲梅稍先白已交柯
天昏土屋雞棲早歲儉瓶糧雀耗多
侶報明年秋熟好不愁寒壓老漁蓑

閨詞

澄澄人坐碧琉璃
今夜清光定屬誰
千瓦鴛鴦俱露宿
紫衾輪與睡鴛兒

沈參政脩芳

脩芳字隆生號菁莪海鹽人
崇禎戊辰進士授工部主事
歷陞淮海副使流寇大亂淮西間芳練兵以備禦寇不敢窺欽授叅政專理漕儲革陋規十萬剔積弊數十條甫一年掛冠歸里有希園集

讀朱穉韜贈許雲公採茶歌

茶熟花香簡送迎
邨齋得此意偏清
近來頗恠盧仝癖
但聽爐頭沸玉聲

往澱州弔二吳有感

曲曲灣隨面面風
故人謾卜永安宮
溪流盡處孤峰出
多在荒涼萬木中

譚主事貞默

貞默字梁生號埽庵
昌言子崇禎戊辰進士授工

部主事

丁未寒食作

春當三月閏寒食
半春期冷暖花無奈
陰晴柳自知
波翻紅燕祿
草染綠蛛絲
此日江南景
偏饒兒女癡

次草萍驛讀孫忠烈感懷王文成擒寧藩詩

路發三衢說爛柯
尋山其奈候人何
田餘紫葉經霜老
林亞黃團照水多
薄暮野亭萍理宿
百年恠事夢中過
額頭殘墨看燒燭
寒雨清吟敗饌饌

顏家海

茁出春空暈淺霞軟紅鮮碧汎妖斜生教東郭為名樹
但說顏家便看花連蔭弄粧遊女鞭出離撩影酒人艤
最憐薄睡臨幽月杜老無言興自賒

附考嘉興白苧邨顏氏有西府海棠共四
株極高大著名禾地花時士女遊觀甚多

采蓮曲

睡起打新蓮蓮塘紅日鮮珠兒停葉露曾得幾時圓

少年行

翦水雙瞳面渥丹紫袍繡駟鵑頭冠秋雕度影來天外
盤馬陰坡撚箭看

竹枝

相思子結合歡花連理枝生並蒂瓜情種原來無草木
春心到處便生芽

料理平林小築簡門人汪爾陶

掛瓢未作買山翁且籍吳涇釣戶中燕幕鶴寮分置定

還餘片席禮希馮

地在吳涇橋畔有
顧野王讀書堂

李太學肇亨

肇亨字會嘉號珂雪九疑先生子與掃庵同主駕
社工詩能繪事有率圃吟稿琴言閣新咏所作如
秋澗流泉雖波濤不興亦自清冷可悅

觀吳繡君寫蘭戲贈

粉痕墨筆香濛濛披圖為我開芳叢斜揎翠袖起盤礴
十指沸沸生春風數枝柔倚楚畹碧雙蒂半吐湘烟濃
綠蛾低映螺黛濕紫幹微雜胭脂紅春宵苦短宿醒渴

疑有清露來瑤空吁嗟此花何遭逢不愁零落向空谷
常在佳人玉腕中

贈王修微女冠

旖旎溪雲淡蕩烟水沈香氣暗衝簾生綃白袷輕籠臂
粉頰青絲半顰眉清許夜琴同鶴夢舊分曉黛入詩禪
散花手腕春風裏自寫蓮經繡佛前

畫景

霽色石橋流水蒼烟沙塢人家誰向曉風吹笛江寒落

盡梅花

金陵

鍾山王氣曉
蔥蘢絳碧嵯峨玉砌重
一自君王移蹕後
監門不打未央鐘

贈吳眺雪

家在天都第九峰
白雲常繞翠芙蓉
杖藜欲問經行地
春雨莓苔認鶴蹤

畫景

千尺寒巖俯沱寥夕陽沙樹影蕭蕭帆檣高下喧魚市
知是江風送晚潮

王休寧佐

佐字佐之號樗崖嘉善人崇禎辛未進士休寧令
宛陵道中

鄰鄰石齒漱溪沙片片青山掛晚霞鳥道一痕天半落
輕輿扶入紫藤花

屠檢討象美

象美字幼繩平湖人崇禎辛未進士授行人對策
稱旨改翰林檢討疏薦倪元璐李邦華等三十七
人尋罷歸築園郡城建百杖廊極泉石之勝後房
廣蓄姬妾聲伎繁豔乙酉聚兵於郡為怨家所殺
與象美共事者倪長珩也

贈王旃林

思入春風散彩雲絨書意氣動相聞俊民吳越空慙我
老將幽燕舊屬君多病士安忘世態窮愁虞相見斯文

居然一榻談經處諸子披襟坐夜分

項太學真

真字不損秀水人崇禎初太學以罪下刑部獄死
有覺園詩草括蒼遊草楚咻帆譚諸種

懷吳穉文

吳子談經鬢未絲官閒却與懶相宜衙空亦可容魚隊
俸薄纔堪買鶴騎首啻一園知不飽梅花兩載豈無詩
思君明月清樽處姑蔑城頭望眼遲

馬封君德澍

德澍字以霖號商雨平湖人襟懷高曠雅善賦詠
以子嘉植貴封給諫有未刻稿一卷

西溪探梅

露浸東湖一杯酒相送西溪幾回首中宵伐鼓出郊原
月在船頭烟在柳石橋竹墅舊往還夢魂先繞秦亭山
西溪有秦亭山紆迴百轉迎清旭鶯啼春早開人顏千樹萬樹
色皓皓高枝低枝盡蒼老如濤噴雪搖晴空如龍蟠泥

見鱗爪遊人多點壽陽粧輕裙十里吹暗香粉蜨翩躚
霜蘂舞滿山石髮俱清涼窮歷幽林愁日落榻借青岑
俯層閣浮生心賞人百不能得一花下應須飲十日微
醉溪灣月伴衾再起看花聲瑟瑟

侖者山翁陳梁

梁字則梁亦稱梁父初名昌應字夢張海鹽人年
十八皈依蓮池大師法名廣籍未幾走長安上書
不用晚年無意於世自稱散木子有菟園詩人稱

菟園公有命者菑浣筆池藏稿或稱命者山翁亦
稱浣公自題其墓曰生無愧怍去無牽纏其聯云
與爾同龕枕米汁至今孤塚有梅花有个亭集為
文光怪崛特奇不可句而事必準古言足垂世詩
亦如之評者謂其如湘川亂雲峨嵋殘雪知言哉

杜門言懷二首

清泉煮白石二旬苦未熟名醴引無數水晶鹽作肉外
稿如木死密藏學蟲伏懷人固妄同對影豈恬獨

劉倫雖不貴頽然嘗自尊
禪阮雖不富而能安其貧
何必富與貴乃可以驚人
人生在適意適意在率真

病

人病心尤靜天晴竹更妍
想唯棋客至妙得酒方傳
塞竇憂風仄推窗喜月圓
了知年命促姑妄話神仙

癸巳除夕西湖

殘雪碎如苔寒烟一棹開
白髮閒今日紅裙解進杯
鷗來增道伴山暗籠雲回
旅寺仍沽酒分題得探梅

刪嚴詠暑

數竿修竹徑新開
容膝吾安禦暑臺
懶未曬書愁伏斷
閒方煮茗待僧來
談禪淺亦恬生死
說夢空能任跼跼
徒自苦無康濟法
耳聽得過口銜杯

別徐陵如

鬱氣結為山自欲
拔去髮不見徐陵
如如無天上月

海上看雪

潮留天外聽還停
日照沙明布地星
但是青山無不白

只留白塔一山青

賁趾山翁陸啟宏

啟宏字叔度平湖人弱冠博極經史不事章句倜儻負奇通輕俠類河朔壯士好談論古今成敗知邊塞事扣之纚纚不可窮也少為貴公子性豪邁嘗遊建業命酒泛舟召舊院名姬大會詞人於秦淮酒半一姬倚檻微嘆曰惜無兩岸紅蕖佐此勝集明日復置讌比客至則晚風拂席荷香襲人舉

座莫測其故蓋於是夕懸金購得數百缸碎而沈之自是十四樓中皆目為樊川復出生平累致千金緣手散去詩法全宗少陵有責趾山房集

讀嘉郡諸先生集十二首

有序

夫稱詩說禮士大夫之高行士而論其風土則必首舉其士大夫以為重亦且曰老成人典型在焉客居無事簡攬遺書蓋有鄉哲之集十數家隨手披讀略致景仰若我郡洋洋大國家璞人珠二百年来其與

於斯者厥亦孔多他日倘或閒暇盡心肆目求之作
者之林以補後牘則生晚幸甚

大司寇鄭端簡公曉

端簡負神姿讀書須一過壯行遂有心遠覽專典故所
見非尋常援筆亦貞懔寤寐通明王森嚴備武庫一代
憲章言後死鮮其五

宮諭屠先生應垓

屠公踐詞林文局矜自制有法御中樞無言避廣麗辟

彼織錦絲玄黃各分製緯握擇所施毋為濇靈異庀言
曾載區東京雜史裔

庶常王先生梅

庶常籍金閨漢庭尚寂寞鬱鬱古雅資不得登著作惟
悴一官難詩魂更天折孫子負薪行若教安所托悲滯
搜短編玉也何須尺

尚寶戚先生元佐

燭火難自飛芝蘭易為感尚寶生嘉隆國華正霍憲賦

詩哭濟南曾中具玄覽豈曰黃鍾歇八音吹不散青藜
一片光照者猶闇闇

黃門許先生相卿

黃門秉冲德稍一登廊廟徵彼恬淡操乃在熙和調性
靈不藉雕咳唾清自肖龍旌時見招豹隱永呼嘯敢以
長者言拘文論年少

贈太常前儀部陳先生泰來

儀部立朝日十九方弱冠抗疏耀前星志氣何沈悍納

獻固嵩高著篇亦霞燦卧龍迴驚波鵬鳥逼柔翰喟焉
身後名聊謝無兒嘆

司成馮先生夢楨

司成文辭家曠若烟霞侶奕奕餐紫芝所革盡凡緒問
字酒滿庭卧花人在墅違時無近心養德在遠舉小子
生其晚時聞貧士語

少司馬沈先生思考

司馬性耿介披鱗不避創慷慨歌戍邊其聲道以壯一

朝天日朗中外表端亮剔歷日以深斲輪見大匠歸卧
駕水濱風流有遺唱

曹郎表先生黃

坤儀高悟人談經舉靈脫沈頓青衿間百家遂隱括一
官著書輕千年翳霧撥弗借詞林支自掬儒宗鉢漢代
明經者註辭亦已達

少詹事黃先生洪憲

碧山表卓鍊奇容掩衆色臣工信有專制義罔遺則屈

法雕蟲間曼辭乃細德相士握明珠藏身羨鴻翼優游
門第高養和以登域

少司成沈先生懋孝

司成大雅流中歲早開戶身聞王李言落落分其路探
經非匿理立誠乏詭步世乃執委端秦漢強自附貢園
十萬言白首焉所慕

汾州太守曹先生徵庸

遠生尚清言冰雪參妙理在衆每遁形涉世偶悅已寥

寥秋蟬聲吸露吐清泚明眸欲向人顧影旋自止人事
不可論逸散安所紀

過爾唯陸舟話別

秋風滿天地吹我破衾衣城東照殘火扣我良友扉燒
燈待我至沽酒充我飢坐我竹樹間寒氣相與微暗葉
響庭右淡月過姜菲萬象咸淒寂談話猶霏霏遠念十
載事宿鳥忽驚飛遊子不成寐起視河漢稀出門即道
路萬里還依依會面安可必念子當復歸

題房大年畫奚官牧驥圖

元朝諸君好養馬萬國選上咸驛騶天閑牽勒披雲錦
畫出屏幃風颭颭學士大夫愛執筆松雪老人名第一
曾向平沙畫翻滾筋肉一團舒卷疾蹄毛圓動宛不停
牧奴突眼驚欲失詔下畫院爭臨效得其筆意纔待詔
此畫畫自房大年不畫翻滾變騰跳一匹緩步兩匹前
首尾交啣騶毛旋奚官執轡氣矯結瞻視與馬相接連
畫馬宜如相馬真不取形似取其神今之畫者但形似

騏驎入手同凡駢三輔種養貴肥脂御廄收牧中涓人
可憐天馬不得見俗眼與手徒因循前年天子獲五驥
顧視相臣立名字紫霄赤電隨皮貌崇禎十年內出五馬命閣臣題名
付之廝卒謹調繫未知此馬何所能過都歷塊誰可乘
君不見九方高相馬驪黃牝牡非所稱良驥終不逢伯
樂垂耳伏櫪長悲鳴

鬪雞行

有序

都城有此戲秋時見之客有持鬪雞圖者送錢五百

為余取酒命余題之且言此圖出自御供

幽燕之人性好鬪放意角爭托鳥獸羊馬怪異久失傳
雄氣紛然寄伏轂觜毛勁發三秋天致養往往先春候
咻咻雄雌非一種好事詢求必遠購當其羽翼短未成
愛惜調護分晷晷若養士百千金赳赳桓桓待禦冠
誰家錦埵開雞場泥沙細滑黃花園五陵年少抱雞來
彩袂蒙籠紫苴繡雙手捧入未解開胡髯拂拂映袍袖
五色輝煌忽立地昂頭却顧神淡秀驍銳已覺誇超羣

沈頓致許終入穀逡巡睥睨若緩之雙翅忽展急馳驟
掉首瞋目流赤星揮膺礮距翻玉甃須臾毛落鬚鬚飄
赤身不用披甲胄鷹鷂悍鷲但一垂鸞鵠翱翔少三覆
此物好猛不可當取喜與人捐頸脰觀者衆眼逐雞行
進退恨不身相當義拳疾視心恍忽踟躕勝負攫毫芒
鉅鹿之陣兵百萬諸侯僅從壁上忙世人悠悠詈雞輩
此等詎得名尋常羽林介士衆林立虎豹羆熊號不一
安能坐借此雞心我武維揚致勁敵披圖攬視中肅然

買駿式蛙同爾德不然明世好鳳皇何用畫雞增粉飾

送司馬堯夫之津門

眼底知交盡憐君復向人食貧無定跡分手即孤身雲
濶兵戈路衣寒滄海春北門開幕府帷幄倚天津

遊西山自紅光寺至延壽寺地弘曠松栢為多

過嘉僖寺將荒略存其名折而北曰證果寺

泉聲出谷靜野路擘山開背指紅光在身移青嶂來亂
松搖暮雨方丈足秋苔指說前邨寺當時證果回

輓譚友夏

雅聞君孝友何以獨詩名
易簡真新調波瀾悅後生
花飛搖弱草柳颭度殘鶯
歎息為朋面三緘負此情

十四夜棘闌看月

愁裏看秋月高樓畫角中
涼陰樓板屋客淚起霜風
泥土如新漬衣裳感舊工
五更眠不得醒夢雨叢叢

郡歸與遐鄉談聚

一棹回春雨深宵散冷烟
別無多日夕話不盡山川詩

思教人靜梅花逼晚妍
喧喧城市裏誰意可同傳

孫孟樸移舟來晤

旅食嗟予活遠歸
見汝難路還年少
熟天各故人看芳
樹沾衣舊春風掠
鬢寒尚餘憂國淚
自歎不能乾

練市道中

見此溪流細逢人問亦稀
秋田遺犢瘦邗桤擁霜肥
市古知山近雲晴聽鳥嘯
小春天不易雙槳莫停飛

朱子葆留宿山樓同沈甫受夜談

金匱石室
卷二十
見祇不能去扶攜復上樓一尊風雨足四幃晚山浮昔
共姜肱被曾同元禮舟十年家國事淚盡薊門丘

伯淳表兄東歸石莊話別有作

旅泊君何好經聲月滿壇詩應良友發老畏衆人看夜
火寒搖市郵籤細出灘田家風味足豈獨憶張翰

和黃存晦念熊經畧詩兼呈胡太六大司寇

十年天地竟何如重憶橫戈撫劍餘方略虛傳充國老
篋中謗蒲樂羊書感時黯淡歌臨穴當事從容笑覆車

祇有廬生稱弟子向人雙眼似當初

同程端伯咏鴈字詩

槐葉黃時薤葉丹幾人閣筆眼初寒漫將八法傳雲女
裁就三書寄烏官塞外無風傳帛易閨中有影寄書難
隨陽倘過彭湖澤擬作洪橋一樣看

歸興

側身西望太行山咫尺投繻向玉關有客漫然疑白璧
無媒終不悔紅顏流離逆旅人情去蕭索寒風壯士還

千載披裘懷想像分明意氣滿塵寰

得李煙客祝髮廬山書

昔年杖履在錢塘又向廬山住草堂參法直皈新慧遠
懷人還憶舊高陽石梁橋滑褰衣穩瀑布巖高漱齒香
指日菟裘吾計就相尋應到虎溪旁

次訓黃平立許余遠歸

易水悲歌萬里風五湖煙雨一舟中長安大道驅流馬
古戍寒秋斷晚鴻醉酒漫勞王處仲抱琴不學李元忠

移文正恐君先我十載徒然草送窮

戊子八月十七夜宿陳山寺同諸子贈潛夫道

友

苾芻薜荔倚龍城早向移文共勒盟處士未忘秋菊意
大夫仍愛古松名數聞鼓角搖邊戍往日山川定月明
海客自諳滄海訊詰朝即聽午潮聲

西苑荷花

太液池頭水深深繞建章總然顏色好那得見君王

咏蘭

煜煜深林色青青楚畹風可憐人不見收拾束薪中

寄贈武安呼延美人

并序

呼延名紅菊字大隱善琴詩有豪士風在劉敬仲公
席上聞之閨生

趙女高彈鼓瑟聲十三十五笑盈盈兩河劍客知名姓
不似溫柔一樣情

送王鱗長之襄陽

襄水東流入漢長大堤兒女唱襄陽客心滿醉宜城酒
不用登樓望故鄉

遣侍兒

燕市秋風冷十年羈人歸思白雲天未曾賣得長門賦
那許黃金奉酒錢

莊學正嚴

嚴字銘五秀水人以歲貢除靖州學正與父友仁
唱和有蟾香齋兩世詩稿

和秋日寄沈中玄韻

喜懼當茲日交遊莫可論高山空盡眼斜照落低門物
色一生渺文章雙鬢存愧餘升斗祿能飽未能溫

攬生趙韓

韓字退之初名京翰字右翰平湖人無聲先生名
動海內韓復繼起時有大許小許之目蓋無聲文
簡貴故骨勁如山退之文雄奇故才大如海萬歷
壬子貢入成均人謂趙氏父子天下才而兩值數

奇馬晚年自號攬生著攬言蠟言蔗言並未刻藁
嘗自言生平於詩自許獨步予覽諸篇雄雉傲兀
刊落常調誠一時之豪也如題耘廬云餅花鮮結
子石榻暖生雲萬季元示近稿云得意皆莊子渾
身是楚詞探梅云酒情空似鶴人意靜于花咄咄
篇云妖嫗尊蛇稱帝子塗人敬虎號山君贈沈孟
然云李白腰間無媚骨荆卿髮上有悲風題雙溪
竹亭云六逸無如李白放七賢唯笑阿戎低夜集

云幽窗恰稱瀟疎雨寒夜尤宜落穆人寄錢稚圭
云幽心夜度鴛鴦水好夢春迷蝴蝶花早春云有
雀可羅玄草室無魚空釣月明船雙梅云厯落友
朋窮李杜孤清兄弟老夷齊皆佳句也

出門

出門何所向馬飢不可策障眼一尺紗安知我顏瘠
雪下西山照見長安陌熱面吹寒風悠悠路旁客

夜織篇答鄒靜長劉半舫兩先生

朔風刺寒閨剪尺聲勒勒盈盈機上女鳴杼中堂側手
理冰蠶絲纖細指痕識走龍既神工翻鴻亦仙力猶嫌
粉膩沾一刻三拂拭驚此奉高堂緝繡妾所職匹繡易
一餐終歲鮮諧直人言天子都黼黻萬方則瞻茲荆揚
篚何不致通國破產募長年揮手謝鄉域濯以芙蓉水
貯以雲母石江湖怒風濤幾為馮夷得衝闕易星霜始
作長安殖長安遊冶兒所尚貂裘黑蜀錦及秦篝紛紛
意昂抑昨夜昭陽宮又進銖衣式吳綾一萬筐慘淡無

顏色同行越溪女已借春風翼朝浣若耶紗夕製霓裳
飾悴榮匪爾為引分敢不默素業苟在茲徙倚欲何即
羅敷與蘇蕙為我三嘆息娣姒勸勿更姑嫜又相逼擲
梭淚霑衣辛苦為誰織

自棲霞登攝山頂

雙屐自冷然孤情入翠烟古壇靈產藥深洞活生泉陵
樹風雷窟江帆楚蜀天生平兀突意原在萬山巔

夜宿牛首

置身雲壑裏翻不見山形卷幔餐新月虛窗立衆星鈴
聲通卜理松氣可延齡清到蓮花漏悠悠徹夜聽

碧雲寺

青山入孤寺丹壁照空王畫棟飛鱗甲清泉走殿廊萬
靈朝帝札百鳥共天香每見金容潤知依日月光

靈谷寺

幽探不肯慵勝具與緣逢花瓣跌千佛潮音響萬松慈
容獅象悅咒食鬼神恭無數峰巒入皆為怪石供

同孫令弘夜登惠山汲泉

非關消內熱同此意清寒投級月亦響出林雲未乾最
宜新火候不作老波瀾為與風塵敵猶憐七椀難

登理安寺山閣望江

由來登此地絕閣幾人攀越嶺當孤寺江聲入萬山供
餘猿弄鉢慈心虎投關歸到湖堤上如聞戒律還

耘廬梅花

宿根不斷返魂香幾線遊絲曳日長漢苑妖錢飛玉蜨

江南嬌女字珠娘
凍雲切切他山石
古意蒼蒼老素王
猶怪前身留媚骨
紅樓曾點壽陽粧

和安無咎寓余虹島作

心遠非關剝啄稀
梅花繞屋水環扉
寒禽榻上窺紅子
名酒牀頭問綠衣
城柝不驚幽卧穩
漁燈遙入夜牕微
與君搔倒烽烟外
總話江南春事肥

贈徐治仙國醫

却怪枚生七發篇
奏刀翻在越人前
更無鍼砭能醫俗

只有烟霞可學仙名酒好儲秋露水奇書多曝杏花天
從今擲去黃金藥恐悞他人五百年

哭叔度

飄泊從軍國士輕誰為公子拜侯生猶慙馬革收骸骨
肯學鴟夷變姓名屐底雲山詩欲畫匣中風雨劍常鳴
杜陵無數間關句每讀雄篇便不平

子夜四時歌四首

白馬誰家郎兩頰桃花冶來去酒爐前金鞭不能下

擘取同心帶藕絲結鴛鴦分明離却藕空絲不能長
歡自照秋水容光徹底見莫令微風來吹作兩般面
圍以煖犀屏酌以玉薤酒酒濃屏又溫何事不可有

送馮茂遠北上

知君丘壑意中多客路風塵奈若何我是長門秋怨女
慙勤勸爾畫雙蛾

答宛如以畫易詩

總是豐肌笑玉環六橋脂粉亦堪刪高心只在匡廬頂

不寫江南無骨山

秦淮竹枝詞

隔園情煖夜深杯消息他家又密猜最是
小鬟低寄語
送茶兼復送花來

吳王井

轆轤聲裏夜涼秋瘦雨滑滑響碧流猶怪五湖人好在
風情不似景陽樓

甘羅城

孤城留得少年名
曉日黃河氣尚英
我是夷門遲暮客
更無情緒說甘生

擬作

雪衣解語自憐才
寂寂簾櫳晝不開
見說閨中新禮懺
南屏社裏放生來

馮子近社集共擬東湖竹枝詞二首

白衣庵裏乞蓮胎
儂拜觀音郎抱孩
繡得雙幡猶未上
阿師先送小名來

湖底曾留市井殘，安知此地不狂瀾。
尚書畫閣銀臺塚，盡作鄰園古跡看。

孫秀才爽

爽字子度，崇德人，崇禎間諸生。

秋懷

疎寮映山帶竹，養怒泉落蠻氣集。杉松漸知林影薄，殘
英泥輕寒側側護羅幕。結志獨傍徨，發憤以著作。愴悼
雅云：厚冥觀還自樂。

馬季子萬方

萬方字遐卿平湖人少負不羈好與酒人遊能高
歌作燕趙聲意有所觸忽碎壺痛哭四座皆驚嘗
為其父上書幾中黨禍復上冢宰堂大聲白冤事
稍解甲申為亡命罹法逸去籍其家有訥庵草

野宿憶靈均子九

野宿貪棲寺風來深樹間柳痕猶繫水人影不留山芳
草平生夢孤尊此日顏寒山何處是明月一層關

鸚鵡湖舟居詩呈同社諸子

離城咫尺即天涯
魚鳥同淨水似家
秋鏡雲開千頃雪
文牕烟罩一重紗
芙蓉香逼蛟龍客
鸚鵡洲寒蘆荻花
自笑垂鈎無所得
輕絲聊借縛歸槎

齊魯道中

流亡極目問黃沙
處處門空立倦鴉
踏破馬蹄惟白骨
涇來人淚盡紅花
田疇彌望無殘粒
長令依然唱晚衙
不識聖明曾旰食
却教新草上封斜

香奩體

角門斜倚半闌干，月上層樓素影殘。
小步羅屏問金鴨，沈香風裏玉釵寒。

朱秀才祖昌

祖昌字令回，海鹽人，崇禎間諸生。

野步

淒風苦縮膝，試步自今朝。
殘雪留晴樹，平沙落午潮。
心隨鷗共坐，吟愛草初髣。
未飽遐觀意，紅塵已覺遙。

陳中書龍正

龍正字惕龍號幾亭初名龍致字發蛟山毓弟嘉善人崇禎甲戌進士授中書時政尚綜覈爭為深文戊寅熒惑守心龍正連進四疏言事天惟在好生致治當責宰輔上感動特諭慎刑己卯彗星見龍正又應詔極陳立冬大雷電又請正郊期當用上辛竟格不行壬午因下詔罪己復三上疏言時政俱優答時盜賊滿天下籌餉無策龍正著議極

言墾荒為救時本計朝議相持不決遂乞歸甲申
京師陷南都起為祠部不赴賦詩有京華歌舞新
南極野哭汎瀾舊帝星之句乙酉微疾死龍正天
性純篤講求身心經濟之學貌癯古兩眸炯然有
心計善治生居官甚廉而好施予著有學言政書
文錄凡六十餘卷輯程子詳本朱子經說語類陽
明要書高子遺書皇明儒統墾荒兆行救荒策會
陶詩衍諸書行世夫講學之流動稱性道而其敗

類無恥過于庸人如先生者有幾人哉

過句容拜先祠

雨後生夕陽淡淡西郭隅西郭何所有祠我先大夫念
昔為此邦正當強仕餘暮帶不遑解晨髮不及梳琴鶴
猶為累經畫忘其劬予方處齟齬梨棗詢有無風霜二
紀來天人忽乖徂遺範不能仰猶疑堂寢居哀號莫我
應居人怪何如僕御告之故婦女皆霑襦情真無復言
淚急乃由愚屢過樂瞻對從今非厥初哀哉其已矣勉

為守身圖

乙丑春季南還

春歸無計挽鄉思，隔蒼茫霧重平沙。
軟風柔草香村墟，描遠翠蓑笠拜斜陽。
冉冉空遊侶，依依獨斷腸。

顏推官俊彥

俊彥字開眉，桐鄉人。崇禎戊辰進士，授廣州推官。
被劾再補松江，後棄官歸，放浪江湖以終。

村居雜興

病卧經旬滿面埃梅花落盡杏花開畫梁無數空巢在
社雨蕭蕭燕不來

陳泰州素

素字澹仙一字元白號大淳桐鄉人崇禎甲戌進
士授開州知州復補泰州有隨鶴吟塞園小草行

郎閔箋

駕湖偕隱詩

有序

樵李吳子巨手居城北秋涇偕其內君項氏吹聆閉

門唱和安貧任運致足樂也但以地鄰塵肆謀徒駕
湖之南其地雖距一水荒僻加深松竹芰荷猶有存
者經營畚鍤吳子於是乎益貧然逸氣壯懷故不稍
減苟患交謫庸能然乎爰賦偕隱以美之

熠熠鴛鴦鳥其采麗以揚恥與雞鶩爭烟霞相翱翔有
湖碧千頃亦名曰鴛鴦湖南雲與樹吞吐生文章中有
芙蓉池琅玕蔭其傍唱和香風中飲食明月光謝彼北
山羅所求非稻粱

題巨手明月樓

一水隔人境長林遠近間湖光明似月樓迴靜於山叢
桂懷賢古新荷製服閒不堪登眺處秋色滿江關

欽定四庫全書

槁李詩繫卷二十一

平湖沈季友編

明

陸御史清原

清原字嗣白號岫青平湖人崇禎甲戌進士授增城令時瘴鄉羣盜旁掠三省清原輕騎造壘諭以禍福賊受命散去擢御史疏諫營醢劾樞輔止募

浙兵及浙西白糧北運累民等事皆見嘉納巡按
福建經淮安疏言吏可法兵單不可支宜留諸援
師聽其調用不報至漳州賊衆萬餘攻城清原計
擒奸宄辛泗等斬之甲申李賊破京清原毀家備
甲仗募兵三千勤王請身討賊疏再上奸相馬士
英格之乙酉復命在途聞金陵陷曰清原故閩吏
當還求死所耳乃入閩疏言閩越唇齒宜亟餉越
即命清原度嶺犒師時馬士英擁兵竄越閩故以

士英棄君喪國視其名士英遂激衆刼餉麾其將
趙體元偽進見猝起刀斫清原墮三指遂為執禁
舟中後錢塘失守士英宵遁清原曰此我授命時
也赴江死

答黃石齋先生

問俗停車到海湄羽書那敢論安危孤城吹笛思當日
中夜聞雞豈異時北望烽煙縈夢遠東瞻林墅出山遲
蒼生極目堪流涕何日綸巾一視師

馬給事嘉植

嘉植字培原別號木山平湖人崇禎甲戌進士授

武進令擢吏垣

莫春雜感和郭臯旭韻

舊客新詩長嘯開年年修禊笛聲哀幾番桃浪傷流水
七里江灘弔古臺白晝風霾山鬼立黃昏月淡杜鵑來
一杯何處澆春恨搖落東風意久灰

贈東湖釣隱

乾坤多壘洗浮丘猶有東湖枕上流金篋何人探岱嶽
玉函到處問滄洲山青攜得隨芒履眼白曾看向貴遊
莫道桐江正蕭瑟客星搖落釣磯頭

孫秀才淳

淳字孟樸嘉興府學生復社始于崇禎戊辰成于
己巳其盟書曰學不殖將落母蹈匪彞母讀非聖
書母違老成人母矜厥長母以辯言亂政母干進
喪乃身嗣今以往犯者小用諫大者擯僉曰諾是

役也淳渡淮泗歷齊魯以達于京師賢大夫士必
審擇而定衿契然後進之于社張溥天如曰忘其
身惟取友是急義不辭難而千里必應三年之間
若無孟樸則其道幾廢蓋先後大會者三復社之
名動朝野淳勞居多然斂怨深矣有梅綰居存草

悲婁吟

哭天
如也

偶因文字立雞壇不料浮言起百端生死幾人知痛哭
風波惟我共艱難北門學士虛華屋南郭先生為撫棺

不負當年風雨夜並將松柏屬餘寒

倪君益以燈字索詩

畫船前月醉西陵曾羨新歌續采菱歸去但逢漁火出
夢中猶認六橋燈

龍湫山人李天植

天植字因仲居平湖之乍浦崇禎發酉舉人後改
名確字潛夫遯跡龍湫山稱龍湫山人數十年不
入城市一子早喪家奇貧門無三尺童厨無爨婢

惟白頭婦相對閒績棕鞋秋冬際俟天目僧至償
其值易去又劈竹為器鬻于人往來海涯九峯顏
然窮老後復耳聾與人相接無一言久或相視而
泣長吏守帥聞其名訪之踰垣避去山中糧絕或
給以酒米非其人雖飢勿受也作詩不規規于摹
擬情思宛轉多出蹊徑之外又和梅花百咏多以
自況尤為清真雋逸得元白之致有蜃園諸刻

雪夜泊舟澣野

以下蜃園集

朔雪沈宵杳江關泊未安窗虛得疎響舟重壓新寒梅
落倡樓笛蘆垂釣子灘鄰航催曉發得共月華看

秦溪柳浪

高柳何年樹春來拂舊灘雨絲搖夕漲風葉捲晴瀾碧
送征帆遠青迷釣艇寒飛花晚猶急又作白波看

清明日長安旅懷

節物傷羈思歸程計夢中柳搖深禁綠花發故園紅鄰
火分銀燭街塵暗玉驄上林春已老為我謝東風

遊青蓮寺

香刹從來古，春風客到稀。
溪光平入座，竹色冷侵衣。
地僻鳥無語，林深花自飛。
相過逢勝侶，茶話總清機。

寄題普慈閣為熊王諸君索賦

雲樹為鄰鎖斷橋，閑干長日傍煙霄。
溪流似帶窗前抱，山色如屏座可邀。
花滿客攜蓮社酒，月明僧聽海門潮。
秋來擬趁雙鴻翼，同禮慈容望泐寥。

冒雨尋菊戲簡知己

冒雨相尋憶駱丞茲遊不獨古人能芝蘭祇許來三徑
裘馬遙知謝五陵紫蟹肥時君莫惜青山晴日我還登
誰將老圃圖秋色添個看花白髮僧

賦傷鄭嬰垣凍死

有序

老友嬰垣年八十一無妻無子女兼無食性高傲
物不肯干人真介守者凍死雪中殊深悲悼賦此
唁之

貧居傲性不干人楚楚衣冠迥絕塵昨夜雪中騎蛟去

白雲堆裏一遺民

江右魏永叔枉訪賦贈十六韻

老病掩衡門高士訪山社肅客疎禮文入座欽風雅憐
予久失聰煩君為抒寫遡跡棲名山尋友到荒野高懷
空古人奇文妙天下何幸衰朽翁乃得親賢者蒿蓬生
輝光愚拙何陶冶貧居鮮供給愧不具杯罍時作遵海
遊甯抱真瀟灑觀濤帶夕舂候旭浴初赭海若與山靈
不恨知者寡新知樂莫樂分手念風馬因歌黃雀行不

覺淚盈把

庚子秋杪余七旬過柴溪精舍喜金車空谷雪
竇天隨兩禪師偕集分賦

誰云七十古來稀白首窮途始覺非
漫向匏樽尋世趣喜同蓮社領清機
名山有道兩雲衲東海無家一布衣
堪笑百年渾似夢不勞生計問漁磯

觀濤閣酌萬定遠

海浦潮平一鏡空石欄樽酒此時同
秋生故邑蕭條處

人在新亭涕淚中山鳥隔林啼晚日江豚狎浪拜西風
聞名欲訪滄洲客好向鼇磯問釣翁

八月十三夜湯山同雪溪諸禪者看月

愛爾東峰月宵深叩竹扉林星時隱隱葉露漸輝輝枯
坐依僧定無言息客機相看惟有此憐我舊顏非

青龍觀古墓

有序

青龍觀在觀山西麓松江僧湛之圖改作稍拓其
址畚鍤咸舉鏗然有聲窮之得古墓焉方下圓上

輓長尺餘首作虎豹形側有晉咸和元年八月十
五宜侯王作數字中有石板長數尺有鏡二瓷鉢
一又小似鉢者數枚時崇禎壬申五年五月廿八
日距晉已千三百餘年宜侯王者史莫可考墓前
有道有石門後壁後有二方孔人疑內為窆所初
開時聞香甚有藤繞墓中鉢中水泓然或曰此古
人藏丹之所恨無碑碣可考聊作小詩記其歲月
姓氏云

千載遺弓鎖碧阿新開日月見咸和蘭膏已燼燈何在
綠玉猶存鏡可磨南渡衣冠無故物東來形勝只滄波
荒丘好與重封誌為爾還吟薤露歌

山中訪宋爾恒

風吹帆影過西城一片浮雲嶺上晴滿地落花春寂寂
萬松臺畔讀書聲

某上人以詩訪余山中

虎溪無復白蓮開羨爾西崑小李才

上人嗜西崑體

欲向山林

尋舊好不妨時趁亂雲來

秋日遊暈頂山

千古令人笑祖龍巖前空有白雲封茲山頭角今何處
飛作東瀛第一峯

春日同社中訪林翁于高宮山

有序

林翁不識名號行第三人皆呼為林三老年八十
餘結茅山腰終日高卧大抵老而好靜避人自適
山下有園多植梅竹青芝爾恒訪之皆有詩

林翁隱居一茅屋繞屋青山皆骨肉故人在昔識翁顏
攜我乘春看修竹竹籬蓬戶春陰陰苔徑松關鎖猿鹿
鄰翁為予前致辭此翁溪山往來熟有時閒投溪上竿
有時閒出隴頭牧鳥嘯日暮翁未歸相對羣峯翠如簇

遊高宮之海會庵

彼岸真孤絕何年築數椽白浮雲不斷紅得日猶先佛
冷鄰山鬼僧貧種海田乘桴吾亦喜秋色正蒼然

自金家灣出抵桃花灣而歸

地險金家口臨危欲杖藜熬波無剩土

東有公冶場俱煮海

栽稻

有新畦海味珍沙虎

此地沙最厚故多此

山禽賤野雞

秋鳥最貴他皆次之

夕陽潮漸落寂寞舊桃谿

過獨山殿

廢殿幽涼色孤峯入破櫺煙銷蜃氣散龍去海雲腥
屋覆藤陰古畦留菜甲青寂寥誰是伴鷗鳥在沙汀

採雨詩

霉天有雨以布盛之味最佳諸名士有採雨詩今因之以下月令詩

茗飲清者事擇水乃先務昔人重蒙泉今則邀天澍時

維閏逢月萬種欣沾注搖搖青苗風濯濯黃梅雨方幅
當中庭俄焉如瀑布簷溜非不可義不取塵污貯之以
素瓷珍之等甘露水性此獨真茗理庶可悟

竹醉日碧筠軒賦

桃李皆艷竹獨清紅紫皆醉竹獨醒此君洵自有奇節
胡然此日煩壘瓶壘瓶罄矣竹不改豈其恬悅迷真宰
移方易向惘不知當年高節今安在吾聞種竹無期雨
即移全憑人事與天時若使沈酣終不改青青安得向

南枝

和中峯大師梅花百詠

選八以下
梅花詩

瑤英無樹不精神
歷慣風霜老更真
地僻祇憐裛王者
天寒應少采香人
難醫司馬消中渴
不濟萊蕪甌裏塵
無用只憐我與汝
年來甘讓錦城春

西湖處士舊交神
千古相知此最真
得月總為荒徑友
棲巖俱是上流人
先將素影驚衰鬢
不為閒心惱客塵
放鶴亭前三百樹
而今無復故山春

澹澹疎疎一種神水邊林下看逾真已無蜨翅能憐汝
不學桃花解笑人林靜儘多閒歲月山空應少別風塵
日斜江路歸來晚數遍牆頭屋角春

蟠桃名姓註三神爾亦前身侍玉真一味清虛應近道
幾番榮落豈由人寧添白板扉邊影肯羨東華道上塵
我本梁園舊賓客當年曾識雪中春

驛使安能寄遠神偶從邨落見來真綈袍未必寒於我
白首徒傷老向人自抱孤情成獨立豈堪隨俗學同塵

萬家簫鼓千門月誰問空山寂寂春

蕭然無累是清神深谷如依鄭子真調鼎未逢黃閣老
臨粧不妬漢宮人高寒只對中宵月解脫何憂萬斛塵
若問長安舊知己漫勞持贈一枝春

一種脩然物外神豈從今日學韜真芝蘭社裏無前輩
鴻雁天邊亦故人老去自能耽白業夢來何處著紅塵
上林瓊樹知多少怪爾先偷碧海春

煙添精爽雪添神臘後年前看始真品格可稱天下士

矯癡寧學掌中人蹇驢尋處聊乘興社燕來時已絕塵
今日歲華從此改家家門戶貼宜春

倪教授端

端初名涵字惺孩平湖清溪人父醇字鍾白著白
雪談柄端家貧父歿與母遷于龍湫山之陰以教
授為業喜為詩好客每蓄旨酒以供吟友兒輩悉
教治農圃有隱者風李潛夫結社海上引惺孩與
宋爾恒王青之往來酬和有放蛩集

登陳山

扶屐盤山磴悠然望不窮
海濤斜捲白秋葉遠含紅
西北瘡痍病東南賦稅空
漫言天地大何處老微躬

宋秀才咸

咸初名斌字二完後字爾恒覺非其別號也平湖
乍浦人工舉子業好詩讀書于陳山潛心易學著
有易說李潛夫為作萬松臺讀易圖說性倜儻不
拘小節工臨池筆力遒勁又善奕家貧薄遊金陵

上湖湘有卜居半山之志不果而卒有覺非草金
陵遊草忘機杜詩選

莫春李因仲攜具偕同社過訪山齋留宿

取意不在遠閉此悠然門讀書白雲午俯仰几席尊泉
飛雨聲來我友命酒樽相見各一笑天趣洽後昆情真
得薄醉禮簡有與論取次選高石振衣望乾坤須臾日
西逝歸影馳暮邨越客戀清景半榻恬夢魂中宵妙語
默澹茗生月痕聚散雖固然依依神理存

王布衣偉

偉字青芝平湖人

登陳山訪李潛夫

顏壁疎櫺古寺荒
佛臺相傍讀書牀
沙彌打餅修山供
逸士攜壺探錦囊
一片石根雲卧冷
萬株松影墨痕涼
磁甌飽飫龍泉水
問取獐龍鉢底藏

徐太學爾穀

爾穀字似之石麒麟從子
石麒麟殉國報忠寺僧以木

櫃盛之炎暑中將及一月事定爾穀變服入城載
至祖塋具棺殮啟櫃顏色如生握手沒爪鬚髮怒
張爾穀後以松江事波及死于江寧妻孫氏聞夫
死一女在抱棄之赴水死立而不仆一門之內臣
死忠子死孝婦死節僕死義嗚呼烈矣

丙戌夜坐

萬籟劃然起淒淒中夜聲鐘鳴秋在寺月出雁橫城簫
鼓當年夢琴書此夕情莫嫌山鬼泣白首盡佳兵

贈顏先生

萋萋芳草望中迷
落盡棠梨水拍堤
誰向扁舟憐別客
白雲相送板橋西

倪主事長珩

長珩字伯屏
平湖人
崇禎丙子解元
丁丑進士授
蘇州推官
轉兵部主事
生平博學好古
善書法精
于制義
臨文伸紙
往往終日
危坐不成
一字然一
藝既就其
瑰奇瑋麗
幽峭奧崛
之致直足
驚人駭

俗上擬周秦非漢唐以下所及也予謂自有明三
百年來讀書種子無此異才而世之龐眉俗士黃
口小兒甫習章句抄襲一二陳言爛語偷取科第
便儼然稱縉紳矣嗚呼如伯屏者其無負乎時文
者歟

次曹秋岳年兄韻

守約安貧賤良朋辱過存吾哀誰與怨疑義幸逢論草
上雨珠碎天邊弦月昏坐來更漏轉香減酒卮痕

五更風雨急驚聽到桃花薄倖迷紅浪攜賓怯綠莎平
疇芳草亂上國美人賒好會浮生僅遲君天外槎

徐舉人柳臣

柳臣字亦于嘉興人崇禎丙子舉人有文名與張
溥並主壇坫為人然諾不苟以友朋為性命其詩
務為新奇不肯蹈襲亦一時勝流也初受業陸別
駕槐眉先生別駕孫渭汭亦執贄于其門並有聲
藝林淵源盖有自矣

題吳娘畫竹

五日為斯畫休猜振筆遲湘山無限竹一葉一相思

柳枝詞

水隔南邨渡小橋低頭吟處識纖腰欲教嫩綠剪溪水
忍向東風折一條

谿默老人錢繼章

繼章字爾斐繼登第崇禎丙子舉人孝友力學鉤
纂甚富晚年築谿默園綴石蒔花垂老不倦有逸

民遺風詩曰雪堂自刪集素心慧質幾于支許清
言矣

落葉

負薪出南郭危嘯上東門丈夫志不死飄泊不足論歸
來問黃葉積墜無晨昏雖懷剝落感生氣歸其根

謁于忠肅祠

楊公湖海一偉人詩心劍氣山水因觀其精神起落處
磊磊洵與古者鄰我今謁于并謁此風吹細草如蘭芷

頭顱墮地非偶然自令頑懦低眉死淋漓誰讀壁間題
喚起隔葉之黃鸝嗟哉詩句是何物枯瓢我欲投深溪
南城日光東市血一寸丹誠空切切石人背上紀歲年

高揖松花落如雪

祠為楊修齡
先生所葺

元夕飲吳仲圭墓上

道人死後冰霜在老梅寫出冰霜怪半枝鱗皴半枝僵
山鬼守根嘗夜拜琉璃却照梅魂歸薜荔為衣女蘿帶
更闌私語孤月前我爾行藏本一派斤斧烏雀不敢辭

嚴冷如君君自愛穿街簫鼓漸銷歇林氣夜清喧不礙
素琴亂帙同留連惜茲佳會何時再西窗月沒僧晨興
抱甕却澆墓前菜

題家孟岸舫

閣以臨流勝斜陽亦帶寒燕鶯人共語竹石水相安坐
客惟蒲褥藏書恥畫欄靜參淳朴意山好不須觀

園居風雨過成二首

風雨聊蕭甚山窗啟閉難甫能含野景漸恐著春寒鞭

笋橫穿閣雛花矮近灘山居無眷屬松竹慰團圓
春岸鴛鴦浦秋籬橘柚門閒風欺獨樹細雨慰空邨魏
晉談何易義皇枕頗尊客來能宿此衣染竹苔痕

鄴城懷古

橫梁高吟善世才斯人豈肯隱蒿萊赤符尚屬山中裔
紫色先華閨位來業擅三分心未死功成百戰老還催
冬春射獵秋書史漢孝廉終亦快哉

園居次韻

土室柴桑潔有痕移家直欲比桃源一叢幽竹新添逕
幾個閒鷗晚到門小閣靜資書卷亂高軒爽愛夕陽昏
此中何物清娛眼楓葉蘆花共一邨

贈徐松之

十年師友痛離羣芝嘆無由救蕙焚蠹簡已揀同永錮
虎賁猶復想遺文高懷楓葉吟邊露細語松濤定後聞
却恐中年損歡趣共君陶寫一溪雲

吳舉人晉書

晉書字接侯麟瑞長子崇禎丙子舉人卒年二十
七海內詩人俱為詩輓之有蓬蒿園集詩學長吉
多屈曲之音是時如陸芝房姚叔祥輩競以此體
相尚而晉書時有雋句人不能到也

釣臺

先生自不識天子文叔何曾知故人珠澤涪溪各成志
玉璜金鎖俱飄塵當年梅尉附瓜葛比舍桐君遺藻蘋
彷彿雲仍自蒙叟碧波深處通濠津

粵行舟發樵李敬次大人述懷

池草夢惆悵竹林懷古辛一舟千嶂月雙劍百蠻人古
繭臨書放仙螺酌味真關河誰物色磯鳥故相親

崇德中秋

語兒涇上繫輕舸語兒涇前聞櫂歌客逢端正那堪別
月惜玲瓏不肯多沙背一痕牽紫荇浪花雙疊走紅螺
坐來幽瑟添無限醕盡清尊可易配

聞磊齋家給諫叔氏以予告還里志喜三首

獨辭仙掖謝明恩
吾道于今石介尊
天下共推江次伯

漢江革以諫議
稱病天下重之

山中重續許雲邨

吾邑以黃門高尚者
杞山與叔二人而已

霖收碧海龍歸窟
露吸青霄蛻在圉

有別業
名蛻圉

應笑竹林

遊子倦不隨童稚候江門

綺里當年返鳳阿
家風重和采芝歌
屠龍手在調猿鶴
補袞身閒製芰荷
綠野客來呼白滿
清齋花發草玄多
松風未解葵心結
消息虞淵望魯戈

三年雷雨回天力
萬里雲霄去國心
大隱宅傳蘿石舊

叔氏居為從遊仙風馭竹田深竹田仙人福地今為別號故云何人共

領鷗湖社有客將歸華萼林大人亦賦歸歎未即遂不審阿蒙堪

預否譚玄他日竊知音

大忠祠二首

祀文信國陸丞相張少傅

張陸南行遠復巡文公此去不迴輪乞師此日無援楚

蹈海何人肯帝秦秋雨浪花千掬淚春風麥飯一杯塵

蘋絲荔子來時節拜罷青天泣鬼燐

青山何處慈元殿突兀諸公俎豆留趙氏又生嬰杵臼

雁門重續魯春秋
炎颶欲颶清霜下
逝水難消碧血流
落日輕靈人不見
秋來花外聽鞦韆

梅花

經春荒却讀書臺
為惜冰顏敢自回
一月伴君差可老
百花從此不須開
鉛華不愛天孫贈
彤管難通鳳鳥媒
願與花神乞延壽
一教桃李識仙才

絕句

黑雲如海濕難飛
寂歷漁翁暝未歸
拾取蘄頭雙雪尾

秋江深處挂蓑衣

劉芳

芳字墨仙嘉善人有清喚齋稿

留別余小星

萍蹤來古剎楓亦在山紅意氣輕文字鬚眉招賤窮何妨相爾汝不覺漸西東岐路一時淚堅持夜月同

巢先生鳴盛

鳴盛字端明嘉興人崇禎丙子舉人

題匏杯

回也資瓢飲悠然見古風
剖心香自發刮垢力須攻
不識金銀氣何知陶冶工
尼山疏水意樂亦在其中

錢僉事棟

棟字仲馭相國士升仲子崇禎丁丑進士授南職
方轉郎中察軍政剔夙弊中涓欲有所撓糾之不
少枉南都稱健決郎遷廣東僉事請養有南園唱

和集

文園雜咏二首

慷慨還吾輩風流讓古人
挿成沿岸柳採遍隔江尊
客子新愁渴郎官舊耐貧
青門瓜漸長隨地掛車茵
天際浮雲散登臺攬翠微
西來風雨是北去雁鴻非
第宅悲金管闕山念鐵衣
中原兵氣壯未敢說漁磯

園居感事詩八首

渺然天水立浮屠風雨西來味
不渝橋板斷時衰葉補
女牆低處遠山扶
文身去國吳公子作賦襄人楚大夫

欲廣絕交千百字芭蕉寫盡再編蒲

蓴絲未老釣絲輕恰有壺觴訂此盟魚鳥晝閒秋易永
池臺夜冷月難生黃花伏枕時情遠紅樹登樓古意橫
願借銀河三尺水斷槎浮去海波平

東阜蒼茫可卜幽括囊猶恐不安流學他竹裏開三徑
讓爾車前看八騶蘭茝有心辭雨露蟪蛄無意識春秋
一燈水榭銷孤坐著作虞卿未是愁

閒心甘比石頭頑周道今成九折灣天許屠沽藏異物

我從鐘鼎辨神姦桃花隔斷終南徑芝草分根少室山
幽恨同人渾不可新來乞巧學奴顏

功名不敢問天公意氣都銷濁酒中豈有酖人羊叔子
甘為避世鹿皮翁文心浪說題鸚鵡物態誰能指蝓螻
莫笑青雲容易致原來腐草會從風

沿坡野草向人涼醉踏啼蛩十里霜閒把唾壺驕處仲
亟收焦尾贈中郎幽居剥啄風塵少末世吹彈歲月忙
暮倚柴扉無所見羣鳬趁水下橫塘

山居不敢夢仙查
隱几看澆數種花
物外崢嶸唯五嶽
人間曲折似三巴
隔簾月帶松篁淺
照水煙翻門巷斜
為語霜楓堆客徑
一丸函谷是吾家

架閣成樓傍竹叢
小山松桂半相同
閒僧投足秋光外
幽鳥防身樹色中
滿地蘼蕪分曉露
沿階苔草縱吟蟲
年來榆柳尤蕭瑟
引得哀蟬一夜風

沈伯子長祚

長祚號純嘏
思孝孫有綠蘿莊小咏

阻風江上

去郭纔數里濤聲尚拍天
黃柑洞庭樹白鷺太湖雲
暗客帆集風腥魚網懸
何當嗟物役鷁首正茫然

沈仲子鴻祚

鴻祚字載猷長祚弟有鶯葉軒稿

有所思

銀漢秋來萬里清
憑高一望四愁生
佳人此夕應腸斷
公子何時與目成
白苧歌殘雲欲散
絳羅剪就月空明

芳華不信終虛擲曾向青樓浪得名

沈季子延祚

延祚字遠猷鴻祚弟有玉蘭軒稿

雜詩

湘簾高軸越羅垂夢裏分明倚雪兒
水調歌殘人不見半輪斜月挂桐枝

項太學禹揆

禹揆字子毗秀水人崇禎間太學與李尚寶子椿

同歿於兵

落花

一番風信客心驚
怨粉愁紅迭迭迎
香篆三更雞舌冷
錦泥十里馬蹄輕
夢回故國無知己
流落天涯不問名
最是芳顏憐易改
難將綵縷繫長生

孫秀才愚公

愚公字伯愚
弘祖子有惜
誦集妻周淑英亦能詩

遲月

團光一片洗雲綠，吹落清寒上高竹。幽人冷掬露下衣，
欲往呼之入書屋。挂我窗端古望舒，盈盈望斷金蟾蜍。
安得晨風鼓雙翼，結璘同駕飛雲車。朱絲夜冷紅香死，
直上丹樓讀寶書。

菊影

柳禿楓殘花事非，晚香寫照入秋肥。籬霞浮動枝隨步，
燈暈初升藥上衣。空搗玄霜羅雪染，應分素月簇瓊飛。
酒闌山谷箋堪賦，未許西風鬪葉稀。

疊雪羅簇
香瓊菊名

悼內二首

花朝半與藥珠飄

淑英沒於甲申花朝

文魄雖寒尚可招
髣髴影隔

花芳跡斷衣香伴
月膩痕銷空餘指粉青
編印冷入琴言素軫凋
一幅畫圖誰得似芳懷
那許箇人描

絡緯聲淒讀史燈
蕭蕭殘夜醉曹騰
繡牀刺縷針空聖
奩几埋塵鑑似冰
雨髮風鬟人不見
鶯愁花泣夢難憑
忍寒何日山公報
謚作閨師最上乘

倪秀才撫

撫字曼青嘉善人崇禎間諸生

和仲馭南園詩

廓落成冬事孤樓不厭憑愛閒先遣鶴忌俗并疎僧詩
似交難少泉因雨易增稜稜天地色池月共如冰

馬訓導鳴雷

鳴雷字國威號伯臺平湖人為靖江訓導經喪亂
歸里乙酉七月遇兵命家人曰我老無所之若等
各宜遠避城陷獨坐空堂遇害

觀海

不信春花拂淺紅
愁聽新雨積空濛
偶來日落登山屐
遂覺寒生破浪風
蜃市隔煙翻去鳥
漁燈吹影斷歸蓬
三更起讀枚生賦
響合濤聲正未窮

吳通判憲

憲初名文憲字萬為海鹽人貢授衡陽別駕嘗單
車解散廣塘礦賊又率百餘卒援桂陽逐流賊後
免歸有陶閣集

落花二首

連宵花信釀輕寒，狼藉燕支樹底看。
啼老鶯聲隨霧散，銜殘燕子到泥乾。
朝霞忽地吹成粉，暮雨時教幻作丹。
無限春風盡消瘦，沈香休更倚闌干。

亭亭花影照重檐，飛向閒階已乍添。
紫陌有時低拂面，朱樓何事競窺簾。
因風繡戶闌容入，映水金鞭去復黏。
若問向來承寵渥，佳人親試玉纖纖。

長安雜書所見

藥榜翩翩濁世佳，目迷五色戰場譁。
朱門競奪風簷錦，金穴重開鎖院花。
縣價通都明有數，濫觴曲市蕩無涯。
誰憐貧女荆釵儉，夜夜寒機嘆月華。

拒賊金堤鑿大梁，望洋河伯遂湯湯。
洪濤不剩城三板，朱邸全沈水一鄉。
王氣陰戕衝鳳泗，國漕中涓徙淮黃。
茫茫盡壑誰貽福，守汴功先叙未央。

守汴諸公引水拒賊河反灌城遂陷

出山霜簡飭官邪，去國青山日影斜。
從賜玦環皆雨露，忽迷天地有風沙。
清流黜矣鉏黃犢，公論譁然降白麻。

剥盡孤陽陰愈盛玄黃野戰日紛拏

劉公宗周以申救給諫大行奪職

堂司回話敢支吾嚴訊累人喘未甦臨案期令寃立洗

讞詞肯教法重誣鴻冥千里違雙闕鷗夢扁舟入五湖

碩果只今都已盡感時淚血濺春蕪

徐公石麒以輕擬姜熊二君奪職

淮南雜書

廣陵北去接淮陰銀鎖藏蕤繡閣深三十六場多估客

黃金買斷阿儂心

西湖雜咏二首

儂家茅屋翠微深
梵潛聽漏半沈
生得阿侯虧佛母
攜來雙拜海潮音

萬壑松寒集慶宮
梵聲依約景陽鐘
玉顱醉死冬青老
猶有山僧捧御容

俞秀才允懷

允懷字懷茲平湖人
明末江浙多以文社相競
一時有婁東金沙雲間西泠之目
允懷受知於張天如
冉冉名場三十年
發為聲譎多高淡寂寞之想

自名其詩曰海濱野老集

讀史雜言

赤輪起東方流光迅如矢歲月積暑寒往來無善意馳
驅多少年忽焉老死至立石峴山頭沈碑裏水次無聊
作異想千載憐其志

陳秀才時

時字九若勾餘人寓海鹽能作大草書道勁有致
兵起時或見其書帙盈兩袖間笑為腐儒釋不殺

時拍其肩大呼曰上天好生兵怒遇害

歌者以西施舞侑觴

巧將歌舞學西施宛見吳宮第一枝
祇恐當時浣紗處風流翻不似今時

吳推官鑄

鑄字鼎吾崇禎丁丑進士司理江西廣信時寇氛
方熾鑄計斬渠魁張普微等餘衆就撫平反疑獄
如夏桂洲後裔艾南英受誣俱賴昭雪

除夕和石鳴咏

不窺戶外不聞兵邨野間聽爆竹聲世上升沈經幾變
山中萸萸未曾更雁書音斷知何在柏葉香浮儘自傾
人地即今先得暖江南無事只宜畊

馬參議鳴霆

鳴霆字國聲號具嚴鳴雷弟中萬歷癸丑進士由
閩縣知縣歷官山東濟南參議以河決罷歸

弔閩中陳烈女

仙遊陳綸女許配姚楷未婚而
楷亡女詣幃痛哭絕粒旬日死

漢竹曾分割九仙貞魂久訝惜芳年伏靈一夢晞朝露
辟穀千秋泣夜鵲志烈古來高截髮聲蜚此去永垂篇
我媚月黯淒風木疑與藁砧訴墓前



馮李詩繫卷二十一